



Meeqqat atuarfianni atuarnermut ilaatillugu sungiusaammik sulinermi assigiimmik sillimaserneqarnissaannut Naalakkersuisut suliniuteqarnissaat pillugu Inatsisartut aalajangiiffigisassaattut siunnersuut. Suliami tassani kommunit, Center for Arbejdsskadesikring attuumassuteqartullu allat sapinngisamik Naalakkersuisunit akuutinneqartariaqarput.

(Inatsisartunut ilaasortaq Debora Kleist, Inuit Ataqatigiit)

Inuit Ataqatigiit Debora Kleist qutsavigiumavaat pingaaruteqarluinnartumik siunnersuuteqarneranut. Pingaaruteqarluinnarpormi meerartatta sullivinnik misiliinermanni isumannaatsumik ersarisumillu ajoqusernermi sillimaserneqartariaqartut.

Maanna kommunit atuarfinnik ingerlatitsisut sillimmasiineq isumannaarisuusussaapput. Tamannali akisussaaffik qularnartut inissisimappat taava misissortariaqarparput. Siunnersuuteqartup ersersippaa tuartut sungiusarlutik suliffeqarfimmiinnerminni aalajangersimasumik atorfeqartuunngimmata inatsit naapertorlugu sillimaserneqarsimanngitsut, kommunillu ataasiakkaarlutik meeqqat atuarfianni atuartunut atuuttumik sillimasiisinnaasut. Kisiannili kommunit ataasiakkaannguit namminerisaminnik sillimasiisarsimapput.

Meerartagut inersimasut sillimmasersimasut suliffiinut misiliitit-tarpagut. Tassani sulianik assigiinngitsunik, sungiussimanngisaminnik misileraasarput. Suliamik sungiussisimanngikkaani ajoquserneq qaninnerusinnaavoq, imaluunniit ajoqusiisoorneq, aseruisoorsinnaappulluunniit nalituunik.

Meeratatta atuarfik qimallugu ilinniakkaminnut kajumissaatigalugulu ilinniarfigisarpaat sullivimmik misiliineq. Atuartuutitta misiliinerminni ajoquserlutik misillinnginnissaat qulakkeerniartariaqarparput isumannaatsumik sillimmaasiinermik.

Taamaammatt siunnersuuteqartoq isumaqatigigatsigut siunnersuut akueralugu ataatsimiitsitaliamut susassaqartumut ingerlatipparput.